



Henrique del Río Otero e Carlos Alberte Muíño Naveira, concelleiros do Bloque Nacionalista Galego no Concello de Betanzos, teñen a honra de propór ao Pleno da Corporación Municipal a seguinte moción sobre o canon dixital

## EXPOSICIÓN DE MOTIVOS

A reforma do texto refundido da Lei de Propiedade Intelectual (TRPLI), aprobada polo Real Decreto Lexislativo 1/1996, de 12 de abril, levada a cabo pola Lei 23/2006, de 7 de xullo, supuxo, entre outras cousas, a reforma do réxime de compensación equitativa por copia privada, definindo un procedemento específico para a determinación da compensación equitativa aplicábel aos equipos, aparellos electrónicos.

Así mesmo, a Orde PRE/1743/2008, de 18 de xuño, estableceu a relación de equipos, aparellos electrónicos e outros soportes materiais suxeitos ao pagamento da compensación equitativa por copia privada, as cantidades aplicábeis a cada un deles e a distribución entre as diferentes modalidades de reprodución. Compensación que a cidadanía coñece como “canon dixital”, de pagamento obrigado para todos os usuarios e usuarias dos devanditos equipos e soportes electrónicos.

O noso Concello utiliza un importante número de equipos e dispositivos afectados todos eles polo canon dixital e que se utilizan exclusivamente para as funcións relacionadas coas actividades que lle son propias e cos contidos xerados polo propio Concello. Actividades que non teñen nada que ver cos contidos suxeitos a dereitos de propiedade intelectual.

No escenario actual, cunha situación económica precaria dos concellos debida, en parte importante, á asunción de competencias impropias sen a dotación económica correspondente para que enriba fosen penalizados con este canon totalmente improcedente e inxusto e a favor dunhas entidades de xestión de dereitos de autor (como a SGAE) moi lonxe de ser transparentes e cuns métodos de actuación extensivamente cuestionados.

Dende a entrada en vigor do “canon dixital”, ademais de terse rexistrado unha importante mobilización social de rexeitamento desta medida, varios Xulgados e Audiencias Provinciais pronunciáronse a prol de quen reclamou contra o pagamento do canon e demostraron que a fin do soporte ou equipo non era a copia privada. O propio Consello de Estado, no seu ditame de 18 de marzo sobre a Lei de Economía Sostíbel, recomendou ao Goberno Central medidas dirixidas “á transparencia das entidades de xestión dos dereitos de autor” e un sistema de canon que non presupoña que cada soporte gravábel se vai usar para copiar material protexido.

No pasado mes de outubro a Sala Terceira do Tribunal de Xustiza da Unión Europea ditou sentenza firme a respecto do canon dixital, fallando que “a aplicación indiscriminada do canon por copia privada, en particular en relación cos equipos, aparatos e soportes de reprodución dixital que non se puxeran a disposición de usuarios e usuarias privados e que estean manifestamente reservados a usos distintos á realización de copias privadas, non



resulta conforme á Directiva 2001/29”; isto é, que o chamado canon dixital non pode cobrarse ás administracións públicas.

En agarda da transposición á lexislación do Estado da sentenza do Tribunal de Xustiza da Unión Europea o noso Concello debe activar os mecanismos necesarios para poder reclamar a devolución daquelas cantidades que pagara en concepto do canon dixital.

Por todo isto, propoñémoslle ao Pleno da Corporación municipal a adopción do seguinte

### ACORDO

- 1. Proceder á cuantificación das cantidades abonadas en concepto de canon dixital correspondente aos soportes e equipos adquiridos polo Concello, empresas municipais e outras entidades dependentes dende a entrada en vigor da Orde PRE/1743/2008 até a transposición á lexislación estatal da sentenza do Tribunal de Xustiza Europeo.**
- 2. Reclamar, ás empresas provedores e ás entidades de xestión de dereitos de propiedade intelectual, a devolución do canon dixital xa abonado resultante da citada cuantificación.**
- 3. Instar á Xunta de Galiza a que actúe como referente para outras administracións e empresas afectadas e, xa que logo, poña en marcha os mecanismos necesarios para reclamarlle ás entidades de xestión de dereitos da propiedade intelectual a devolución das cantidades abonadas pola Administración galega en concepto do canon dixital.**
- 4. Dar traslado destes acordos á Presidencia da Xunta de Galiza para que se lle traslade ao Presidente do Goberno Central, así como aos Grupos Parlamentarios do Parlamento de Galiza.**

En Betanzos a 20 de decembro de 2010

Henrique del Río Otero

Portavoz Municipal do BNG en Betanzos